

PBB beri amaran peningkatan ketara paras air laut di kepulauan Pasifik

BH 28/8/24 pg 34

Nuku'alofa: Pertubuhan Bangsa-Bangsa Bersatu (PBB) memberi amaran pada sidang kemuncak kepulauan Pasifik mengenai data penyelidikan yang menunjukkan peningkatan ketara paras laut di rantau itu, berbanding purata global.

Setiausaha Agung PBB, Antonio Guterres, mengisytiharkan amaran SOS berhubung bahaya yang dihadapi akibat peningkatan ketara lagi pantas paras laut

global terutamanya kepulauan Pasifik.

"Saya berada di Tonga untuk mengeluarkan SOS global - Selamatkan Laut Kita - mengenai peningkatan paras laut. Malapetaka di seluruh dunia meletakkan syurga Pasifik ini dalam bahaya," katanya.

Mempunyai kepadatan penduduk yang sedikit, dengan kurang industri berat, pulau-pulau Pasifik secara keseluruhan menghasilkan kurang 0.02 peratus daripada pelepasan global setiap tahun.

Namun, kepulauan gunung berapi yang luas dan pulau cincin

itu amat terancam dengan musibah peningkatan paras laut.

Pertubuhan Meteorologi Sedunia (WMO), sejak awal 1990-an, memasang tolok air pasang di pantai terkenal Pasifik untuk pemantauan dan laporan baharu.

Dapatan yang dikeluarkan oleh badan pemantauan iklim PBB itu menunjukkan laut meningkat sekitar 15 sentimeter (sm) di beberapa bahagian Pasifik dalam tempoh 30 tahun yang lalu, berbanding purata global peningkatan laut sekitar 9.4sm.

"Ia semakin jelas bahawa kita sangat kesuntukan masa untuk mengubah keadaan sedia ada,"

kata pegawai tertinggi agensi ramalan itu, Celeste Saulo.

Sesetengah pulau, terutama di Kiribati dan Kepulauan Cook, bagaimanapun dilihat mengalami kenaikan yang setara atau berada di bawah purata global.

Namun, di tapak lain seperti ibu kota Samoa dan Fiji, paras laut meningkat hampir tiga kali ganda lebih tinggi.

Di negara Pasifik, Tuvalu, tanah pula kini semakin terhad sehingga kanak-kanak menggunakan kawasan tar di lapangan terbang antarabangsa sebagai tempat permainan sementara mereka sendiri. - AFP



Kawasan pesisir pantai Suva, Fiji di kepulauan Pasifik berdepan peningkatan paras laut yang ketara. (Foto AFP)